

יש לומר ד' מזמורים הראשונים שבתהלים כי יש בהם ש"י תיבות כמנין קרי ור"ת  
וס"ת מהמזמורים מניין קל"א כמנין סמא"ל כדי להנצל מקרי. וגם יכוין בשם יהוה  
בנקוד ברית:

א. א אשרי האיש אשר לא הלה בעצת רשעים, ובדרך חטאים לא עמד,  
ובמושב לצים לא ישב: ב כי אם בתורת יהוה חפצו, ובתורתו יהגה  
יומם ולילה: ג והיה כעץ שתול על פלגי מים, אשר פריו יתן בעתו  
ועלהו לא יבל, וכל אשר יעשה יצליח: ד לא כן רשעים, כי אם כמץ  
אשר תדפנו רוח: ה על כן לא יקומו רשעים במשפט, וחטאים בעדת  
צדיקים: ו כי יודע יהוה דרך צדיקים, ודרך רשעים תאבד:

ב א למה רגשו גוים ולאומים יהגו ריק: ב יתיצבו מלכי ארץ ורוזנים  
נוסדו יחד, על יהוה ועל משיחו: ג ננתקה את מוסרותימו ונשליכה ממנו  
עבותימו: ד יושב בשמים ישחק, אדני ילעג למו: ה אז ידבר אלימו  
באפו ובחרונו יבהלמו: ו ואני נסכתי מלכי על ציון הר קדשי: ז אספרה  
אל חק יהוה, אומר אלי, בני אתה, אני היום ילדתיך: ח שאל ממני ואתנה  
גוים נחלתך ואחזתך אפסי ארץ: ט תרועם בשבט ברזל ככלי יוצר  
תנפצם: י ועתה, מלכים, השכילו הנסרו שפטי ארץ: יא עבדו את יהוה  
ביראה וגילו ברעדה: יב נשקו בר פן יאנת, ותאבדו דרך כי יבער כמעט  
אפו, אשרי כל חוסי בו:

ג א מזמור לדוד בברחו מפני אבשלום בנו: ב יהוה, מה רבו צרי, רבים  
קמים עלי: ג רבים אמרים לנפשי אין ישועתה לו באלהים סלה: ד ואתה  
יהוה מגן בעדי, כבודי ומרים ראשי: ה קולי אל יהוה אקרא ויענני מהר  
קדשו סלה: ו אני שכבתי ואישנה הקיצותי כי יהוה יסמכני: ז לא אירא  
מרבבות עם, אשר סביב שתו עלי: ח קומה יהוה, הושיעני אלהי, כי  
הכית את כל איבי לחי, שני רשעים שברת: ט ליהוה הישועה על עמך  
ברכתך סלה:

ד א למנצח בנגינות מזמור לדוד: ב בקראי ענני אלהי צדקי, בצר  
הרחבת לי, חנני ושמע תפלתי: ג בני איש, עד מה כבודי לכלמה,  
תאהבון ריק תבקשו כזב סלה: ד ודעו כי הפלה יהוה חסיד לו, יהוה  
ישמע בקראי אליו: ה רגזו ואל תחטאו, אמרו בלבבכם על משפככם  
ודמו סלה: ו זבחו זבחי צדק ובטחו אל יהוה: ז רבים אמרים מי יראנו  
טוב, נסה עלינו אור פניך יהוה: ח נתת שמחה בלבי, מעת דגנם  
ותירושם רבו: ט בשלום יחדו אשכבה ואישן, כי אתה יהוה לבדד לבטח  
תושיבני: